

ADYAYA I

PURWAKA

1.1. Dadalan Pikobet

Peplajahan basa Bali silih tunggil peplajahan basa daerah sane sampun ngranjing ring muatan lokal sane kaplajahin ring sekolah-sekolah ngawit ring *jenjang SD, SMP* ngantos *jenjang SMA/SMK* ring provinsi Bali. Indik punika sampun manut ring Pergub No. 20 Warsa 2013 Pasal 4 maosang indik *“Bupati/Walikota dapat mewajibkan satuan pendidikan untuk mengajarkan mapel Bahasa Bali minimal 2 jam pelajaran per minggu”*. Ring kawentenan pergub puniki, peplajahan basa Bali sane kalaksanayang ring sekolah madue tatujon antuk nincapang makudang-kudang kawagedan sisia sane marupa kawagedan nguratiang, mabebaosan, ngwacen miwah nyurat basa, aksara taler sastra Bali. Peplajahan basa Bali ring *tingkat SMP* pinaka penegep taler ngaresepang *materi* basa Bali sane sampun kapolihang ring *tingkat SD*.

Kawentenan peplajahan basa Bali sane kalaksanayang ring sekolah akeh nemonin pikobet. Santukan basa Bali puniki meweh karesepang ring kosa basa miwah aksaranyane. Maosang indik ngaresepang aksara, silih sinunggilnyane wenten paajah-ajah ring peplajahan basa Bali punika wenten pelajahan ngenenin nyurat aksara Bali. Kawagedan nyurat aksara Bali ring peplajahan becik kaicen, santukan madue kawigunan nincapang kaweruhan miwah kawagedan ri sejeroning nyurat aksara Bali. Nanging peplajahan nyurat aksara Bali ring sekolah

inggian ring kelas VIII A SMP Negeri 2 Sawan pikolih sane kapolihang dereng nincap utawi kirang ngamolihang pikolih sane maksimal.

Ri sajeroning peplajahan nyurat aksara Bali sane kamargiang ring kelas, wenten makudang-kudang pikobet sane kapanggih, utamanyane indik kirang *motivasi* sisia nyarengin peplajahan nyurat aksara Bali sane kaicen, santukan *motivasi* malajah metunyané saking angga miwah palemahan sisia ri sajeroning sisia malajah antuk ngentosin perilaksananya. Kawentenan punika kapolihang mawinan guru nenten ngicenin *motivasi* majeng ring sisia miwah sisia nenten seneng tata cara guru ngamargiang peplajahan (Hamzah B. Uno, 2011: 23). Mawinan kawentenan punika patut kauratiang olih guru ri kala ngamargiang peplajahan.

Manut pikolih sadu wicara sareng guru basa Bali ring kelas VIII A SMP Negeri 2 Sawan sane mawasta Ketut Suwara, S.Pd., ring pamargi peplajahan guru durung ngawigunayang *model* peplajahan sane *inovatif* utawi guru kanton nganggen *metode konvensional*. Kawentenan punika prasida kacingak ring kahanan malajah ring kelas sane durung *interaktif*. Lianan punika, ri kala malajah nyurat aksara Bali wenten akeh dadalan sane ngranayang sisia nenten *seneng* ri kala malajahin nyurat aksara Bali, inggih punika sisia meweh nguningin indik wangun aksara Bali miwah sisia punika meweh malajahin nyurat aksara Bali santukan wenten pasang aksara Balinyane sane ngranayang sisia takut sadurung malajahin nyurat aksara Bali, antuk punika kewagedan nyurat aksara Bali ring peplajahan basa Bali karasayang meweh olih sisia. Ring kawentenan pikobet-pikobet punika, guru mangda prasida ngamargiang peplajahan sane *inovatif*, silih

tunggilnyane ngamargiang panglaksana *model* peplajahan sane becik, mangdane kedaut manah sisia nyarengin pelajahan nyurat aksara Bali.

Model peplajahan sane prasida kaanggen nepasin pikobet sane sampun kawedarang ring ajeng inggih punika *model Kooperatif tipe NHT*. *Model Kooperatif tipe NHT* inggih punika silih tunggil pidabdab ngamargiang peplajahan sajeroning sisia ngwangun tempekan sane *heterogen*. Mapaiketan sareng peplajahan sane kalaksanayang ring mangkin, sekolah-sekolah sampun ngalaksanayang peplajahan *luring*, antuk kawentenan *model* punika sisia ri kala ngalaksanayang peplajahan prasida mesadu ajeng sareng sawitran lianan ri kala malajahin materi sane kaicen olih guru. *Model* peplajahan puniki ngutamayang indik *kerjasama* inggihan sisia sareng tempekannyane mangda prasida ngamolihang tetujon peplajahan, santukan *model Kooperatif tipe NHT* pinaka *model* peplajahan sane kalaksanayang ngwangun tempekan, santukan soang-soang sisia madue gegambelan (tanggungjawab) antuk pakaryan ring tempekannyane Shoimin (sajeroning Suar Adnyana, 2022).

Ring *model* punika, soang-soang sisia kaicen nomor olih guru. Kawentenan nomor puniki, sisia pacang mautsaha nyarengin pabligbagan miwah mangda ngaresepang *materi* taler prasida nyawis pitaken sane kaicen olih guru. Ring *model* puniki wenten kaluwihannyane minakadi, ring soang-soang sisia ri kala malajah sampun sayaga samian, prasida ngamargiang pabligbagan sane yukti, taler sisia sane sampun waged mangda prasida ngajahin sisia sane kirang waged (A'la, 2010: 100). Kawentenan kaluwihan saking *model Kooperatif tipe NHT* punika kaaptiang mangda kawagedan nyurat aksara Bali sisia sayan nincap.

Wenten silih tunggil tetilikan sadurungnyane saking Nur Kholis ngenenin indik *model* peplajahan *Kooperatif tipe NHT* sane mamurda “*Penggunaan Model Pembelajaran Numbered Head Together Untuk Meningkatkan Hasil Belajar Siswa*”. Ring tetilikan saking Nur Kholis puniki nemonin pikobet inggih punika kacingakin wenten 20 sisia ring kelas, nanging wantah papat sisia manten pikolih ma lajahnyane sane becik. Rerednyane pikolih malajah sisia puniki kawetuang saking *model* peplajahan sane kaanggen olih guru nenten anut sareng materi sane kaicen. Antuk nepasin pikobet punika, panilik sane mawasta Nur Kholis ngalaksanayang peplajahan nganggen *model Kooperatif tipe NHT*. Pikolih seusan ngawigunayang *model Kooperatif tipe NHT* puniki, pikolih malajah sisia prasida ngamolihang pikolih sane maksimal. Cutetnyane, ring pamargin *Model Kooperatif tipe NHT* puniki prasida kaanggen nepasin pikobet ri sajeroning peplajahan nyurat aksara Bali.

Tetilikan sane ngawigunayang *model Kooperatif tipe NHT* sampun naenin kamargiang olih panilik tiosan minakadi, ring Universitas Dwijendra miwah Universitas PGRI Mahadewa Indonesia sane kapolihang artikel ring jurnal nasional. Ring sor puniki jagi kabahbahang. Sane kapertama mawasta I Ketut Suar Adnyana sareng Ni Kadek Juniawati nglaksanayang tetilikan sane mamurda “*Penerapan Model Pembelajaran Numbered Head Together (NHT) Untuk Meningkatkan Kemampuan Mentransliterasi Siswa Kelas VIII H SMP Dwijendra Denpasar Tahun Pelajaran 2019/2020*”. Tetilikan puniki nyutetang indik pangawigunayan *model Kooperatif tipe NHT*. Sane kaping kalih wenten tetilikan sane mawasta Ni Wayan Sariani ngemargiang tetilikan sane mamurda “*Meningkatkan Prestasi Belajar Menulis Aksara Bali Siswa Kelas IX 10 SMP*

Negeri 1 Kuta Selatan Tahun Pelajaran 2017/2018 Melalui Penerapan Model Kooperatif Tipe NHT". Tetilikan puniki nyutetang indik pangawigunayan *model Kooperatif tipe NHT*. Makekalih tetilikan punika sareng tetilikan sane jagi kamargiang pateh nganggen materi aksara Bali miwah nganggen *model Kooperatif tipe NHT*, nanging pabinayannyane ring jejereng miwah ring bantang pikobetnyane. Ketahnyane, ring makekalih tetilikan sadurungnyane nenten nganggen bantang pikobet ngenenin indik penampen sisia sausan ngawigunayang panglaksana *model Kooperatif tipe NHT*.

Madasar ring dadalan pikobet sane sampun katlaratang ring ajeng, punika mawinan panilik ngambil tetilikan sane mamurda **“Nincapang Kawagedan Nyurat Aksara Bali Sisia Nganggen Model Kooperatif tipe NHT (Numbered Head Together) ring Sisia Kelas VIII A SMP Negeri 2 Sawan”**. Kawentenan tetilikan puniki, kaaptiang guru mangda prasida ngamargiang *strategi model peplajahan Kooperatif tipe NHT* taler ring peplajahan nyurat aksara Bali sane kalaksanayang ring kelas VIII A SMP Negeri 2 Sawan puniki prasida ngamolihang pikolih sane becik tur sisia sayan waged.

1.2 Ngrereh Pikobet

Madasar ring dadalan pikobet ring ajeng, wenten pikobet sane sampun karereh, inggih punika: (1) Guru durung ngawigunayang *model* peplajahan sane *inovatif*, (2) sisia meweh ngresepang indik wangun aksara Bali taler meweh ngresepang kawentenan pasang aksara Bali, taler (3) Peplajahan nyurat aksara Bali ring sisia kelas VIII A SMP Negeri 2 Sawan durung ngamolihang asil sane maksimal.

1.3 Ngwatesin Pikobet

Ring pikobet sane sampun karereh, pikobet-pikobet ring ajeng puniki jagi kawatesin inggih punika wenten ring model peplajahan sane kaanggen inggih punika *model Kooperatif Tipe NHT*. Model puniki pacang kawigunayang ri sajeroning peplajahan Nyurat Aksara Bali ring kelas VIII A SMP Negeri 2 Sawan. Kawentenan peplajahan nganggen *model Kooperatif Tipe NHT* puniki mangda prasida ngwantu pikobet sisia ring peplajahan, taler mangda prasida nguningin sapunapi panampen sisia sane wenten ring kelas VIII A SMP Negeri 2 Sawan.

1.4 Bantang Pikobet

Madasar antuk dadalan pikobet puniki, wenten makudang-kudang bantang pikobet sane kapanggih, inggih punika :

1. Sapunapi pamargi *model Kooperatif tipe NHT (Numbered Head Together)* kaanggen nincapang kawagedan nyurat aksara Bali ring sisia kelas VIII A SMP Negeri 2 Sawan?
2. Napike *model Kooperatif tipe NHT (Numbered Heads Together)* prasida kaanggen nincapang kawagedan nyurat aksara Bali ring sisia kelas VIII A SMP Negeri 2 Sawan?
3. Sapunapi indik panampen sisia kelas VIII A SMP negeri 2 Sawan ring kawentenan *model Kooperatif tipe NHT (Numbered Head Together)* kaanggen nincapang kawagedan nyurat aksara Bali?

1.5 Tetujon Tetilikan

Madasar antuk tetilikan puniki, tetujon tetilikan puniki inggih punika :

1. Mangda uning sapunapi pamargin *model Kooperatif tipe NHT (Numbered Heads Together)* kaanggen nincapang kawagedan nyurat aksara Bali ring sisia kelas VIII A SMP Negeri 2 Sawan.
2. Mangda uning *model Kooperatif tipe NHT (Numbered Heads Together)* prasida kaanggen nincapang kawagedan nyurat aksara Bali ring sisia kelas VIII A SMP Negeri 2 Sawan.
3. Mangda uning panampen sisia kelas VIII A SMP Negeri 2 Sawan ring kawentenan *model Kooperatif tipe NHT (Numbered Heads Together)* kaanggen nincapang kawagedan nyurat aksara Bali.

1.6 Kawigunan Tetilikan

Tetilikan sane kalaksanayang punika madue kawigunan sane kakepah dados kalih soroh, inggih punika kawigunan pamucuk miwah kawigunan panglimbak. Ring sor puniki jagi katkatarang indik kawigunan tetilikan.

1. Kawigunan Pamucuk (*Teoritis*)

Manut kawigunan pamucuk, kawentenan tetilikan puniki kaaptiang mangdane mawiguna antuk nincapang kawagedan sisia ring sajeroning mata pelajaran basa Bali utamanyane palajahan nyurat aksara Bali.

2. Kawigunan Panglimbak (*Praktis*)

Kawigunan panglimbak kakepah antuk tiga, inggih punika :

a. Majeng ring sisia

Malarapan antuk kawentenan tetilikan puniki kaaptiang mangda ring *model* paplajahan puniki, sisia prasida ngeresep daging peplajahan sane kamargiang. Punika taler mangda prasida kaanggen nincapang kawagedan sisia.

b. Majeng ring guru basa Bali

Kawentenan tetilikan sane nganggen model Kooperatif tipe NHT puniki kaaptiang mangda prasida nincapang kaweruhan miwah wawasan guru sane nerapang *model Kooperatif tipe NHT (Numbered Head Together)* anggen nincapang kawagedan miwah pangresap sisia sajeroning nyurat aksara Bali. Lianan punika, guru mangda nguningin pikobet-pikobet sisia ri kala ngalaksanayang paplajahan nyurat aksara Bali.

c. Majeng ring panilik selanturnyane

Pikolih tetilik puniki prasida anggen dasar yening wenten panilik sane jagi nilikin panglimbak pepajahan nyurat aksara Bali nganggen *model Kooperatif tipe NHT*.